

2429.

4 sheets



Bibl Jag

ELBINGÆ
JOACHIMI PASTORII. D.

De conservandâ literarum gloriâ

ORATIO
INAUGURALIS.

ELBINGÆ.

Typis CORELLIANIS.

ANNO 1653.

ELBINGÆ
INCLYTÆ CIVITATIS
MAGISTRATUI AMPLISSIMO
& Ordinibus Civium universis

hanc Orationem

Lubens meritoq;

Cum voto omnigenæ felicitatis

d. d. d.
Joachimus Pastorius, D.

585481

I

MAGNIFICA
ET GENEROSA HO-
NORATISSIMA FLOREN-
TIS SIMAq; OMNIUM OR-
DINUM & ÆTATUM
CORONA.



Nnumera sunt benefi-
cia, quibus Divina liberali-
tas, prima omnis boni sca-
turigo, conditum à se ge-
nus humanum devinxit, &
perpetuò usq; vectigale sibi
reddit. Hominem universi
hujus compendium, hominem cœli sui hære-
dem fecit: homini naturam rerum subesse &
velut ancillari voluit. Homini, ut rebus, qui-
bus præesse debebat, præstantior esset, Divini-
tatis suæ traducem, auræ cœlestis particulam,
semen immortalitatis, sapientiæ suæ incompa-
rabilem radium, Intellectum, infudit. Eidem,
ut luctæ ejusdam, & postea victoriæ, adeoq;
simul laudis & præmii luculentioris aperiret ma-
teriam, corpus circumdedit, quod animi habi-
taculum & instrumentum, sed plerumq; etiam
A hostis,

hostis, proditor ac tandem defertor est. Sæpè rebellat servus iste, sæpè recalcitrat vector; saltem ita segnis plerumq; est, ut perpetuis stimulis & quasi ferulis ad res laudabiles agi impelliq; debeat. Ac nisi subinde à DEO variis adminiculis luctator animus sublevaretur, haud sanè is ignavas istas membrorum moras pervinceret,, hosti domestico & à terrâ suâ novum identidem robur ducenti impar esset, servo, cui imperate debuerat, miserè serviret. Verùm non deserit istam propaginem suam Propitium Numen: surculum hunc, si ipse modò non desit sibi, prima illa & suprema omnis vigoris roborisq; radix non destituit. Subinde & ex hominibus excitat aliquos, qui scintillam in cineribus oblitescentem eliciant, qui languenti auram afflent, materiemq; suggerant, ubi gliscere illa, ubi emicare, & in pulcherrimam exardescere flammam possit. Quà in re cum multorum desudet labor, tum nescio an cujusquam luculentior atq; efficacior existat industria, quàm eorum, qui adolescentiam cujusq; hominis ab ipso mox quasi sinu parentum susceptam bonis & necessariis imbuunt disciplinis. Hi virtutis decus tenellis & nullo adhuc alieno colore infectis

infectis Puerorum oculis objiciunt; hi turpitudinem demonstrant vitii, Virtutem laude, & si possunt, præmio, vitium averfatione & severâ subinde prosequentes censurâ. Hi DEI reverentiam, parentum seniorumq; omnium cultum, hi honesti inhonestiq; discrimen docent; hi rerum laudabilium amaras radices, sed dulcissimos fructus; hi pudoris decentissimam purpuram, fædissimum contra Impudentiæ callum ostendunt ignaris. Tales in omni omninò domo honestiore, certè in omnibus benè constitutis Rebuspubl. haberi, & ob summè utilem necessariamq; eorum operam, foveri, ac ceu primi Reip. cujusq; nutritii atq; educatores, de publico ali consuevere. His iisdem Gymnasia, officinæ literariæ, theatra quodammodo & quasi Curia constitui solent; quæ augustæ alibi, alibi angustæ ac pauperes, qualescunq; autem sunt, omnis ubiq; Ecclesiastici & civilis regiminis non seminaria tantum, sed & præludia; loci autem, in quo cum curâ instituta, cum curâ conservantur, præcipua decora atq; ornamenta sunt. Eâ in re Civitatem hanc nostram aliis sui similibus inferiorem esse, noluere majores, qui anteactis seculis hîc ad gubernacula

A 2 sedentes,

sedentes, patriæ rei non alium meliorem sub-
sterni fundum posse animadvertêrunt, quàm
bonam rectamq; primæ ætatis institutionem.
Unde curâ eorum Schola hæc erecta est, aper-
tiq; Musarum rivuli, quos non indigenæ tan-
tum juventuti, sed subinde etiam advenis, iisq;
illustribus bibere dulce fuit. Legi nuperrimè li-
teras, anno millesimo, quingentesimo, octoge-
simo quinto Levartoviæ à Magno Poloniæ Sena-
tore, Firelio, cujus & abnepotem hic jam vide-
mus assidentem, scriptas, ubi is inter alia pro-
pensissimæ voluntatis erga Senatum Elbingen-
sem autoramenta, Urbis hujus alumnum
se esse, hîcq; prima literarum elemen-
ta sub Gulielmo Gnaphæo & Johanne
Sprengelio urbis hujus postea Burggra-
bio & Præconsule dignissimo, præce-
ptoribus suis, (verba ejus recito) colendis,
didicisse, liberaliter fatetur. Attamen-
tum adhuc variis ex causis, sed inprimis ob Mar-
tis prædominantis ferociam angustius locis istis
Musæ habitabant: donec affulgentibus constan-
tioris Pacis halcyoniis, extulere caput suum,
& sui

de conservandâ literarum gloriâ.

50

& sui deniq; amore piorum magistratuum animos ita accendêre, ut spectatiora iis domicilia impensâ publicâ exstruenda putarent.

Id quod istâ in Vrbe anno post natum Servatorem millesimo quingentesimo nonagesimo nono spectabilis Senatûs curâ, & amplissimorum imprimis virorum **Georgii Braunii** Præsidis, **Alberti Isendorffii**, **Joannis Sprengelii**, **Georgii Videri** ductu industriâq; factum testantur commentaria civitatis, & illi, quos Musæ, super meliore fortunâ suâ tum lætantes, certatim effudêre, plausus poëtici. Vix potuit verò Gymnasii hujus natalis in tempus incidere notabilius. Ferè enim is mense tantum uno seculi decimi sexti nunc labentis ortum antecessit: ita ut insigni adeò ætatum segmento synchronus seu coævus, illustri planè notâ & quasi epochâ hominum sese inserat memoriæ. Deinde nec illud animi curiosi observatione indignum arbitror, quod schola hæc paulò ante eum diem dedicata est, quo Ecclesia Christiana, vulgarem temporum rationem antevertens, sacrum suum annum redauspicari, & τὸ λόγῳ in carnem humanam **Adventum** fo-

A 3

lenni

lenni celebritate recolere consuevit. Ita ut jam tum, ex ipso nascentis Gymnasii tempore non male colligi posset, ad Christum, qui usq; etiam ad homines, atq; ad pueros etiam, quos nunquam fastidiit, venire solet, ad Christum inquam, recipiendum istud, quicquid est, institutum atq; exstructum esse. Istius ejusdem natalis memoriam quotannis hactenus renovare hic Musæ consuevere; ut in DEUM, ut in Fautores eruditionis, ob additum literis splendorem, sese gratas esse testarentur: more sanè laudabili, & quem nefas sit usq; etiam exolescere. Ac ei ut hoc quoq; anno jus suum exsolvatur, ego nunc locum istum verba ad vos faciendi animo conscendi: accedente inprimis alio stimulo, qui & solus ad has dicendi partes me vel nolentem impellere fuit idoneus. Et enim quia Amplissimo Magistratui Gymnasii hujus regimen mihi concedere placuit: id si absq; prævio solenni sermone aggrederer, parum & muneris dignitati, & committentium honori, & meæ deniq; famæ viderer consuluisse. Argumentum vestiganti mihi haud diu equidem vacillavit animus, quin de literis dicendum mihi esse putarem. Neq; enim ulla alia mate-

ries

ries vel loco huic vel tempori videtur esse accommodatior. Non verò de earum vel utilitate vel pulchritudine dicam: quia utraq; hæc & propriâ sponte suoq; quasi fulgore satis splendet; & à multis aliis luculenter exposita est: adeò ut de his rebus dicere, foret cramben apponere, ad quam doctissimus quisq; naufragaret. Sed nempe cum literas ad altum planè fastigium hodie pertigisse videamus, justusq; omnibus rerum peritis metus sit, ne inde in præceps eant, de conservandâ earum gloriâ perorare hîc, quantum virtum mearum & temporis dati modus patiètur, constitui. Vos, honoratissimi Auditores, audiendi alacritate, patientiâq; quâ humanitate vos esse novi, animos, spero, dicenti addere, & liberè, ut oportet, loquenti veniam impertiri voletis. Ego certè, ne quisquam ea quæ de publicis literarum calamitatibus, & bonæ mentis obstaculis dicuntur, malè interpretando ad se trahat, id verò, antequam ulteriùs provehar, etiam atq; etiam ab omnibus peto atq; contendo. Vbi incremento locus non est, vicinus occasus est, inquit sapientissimus Stoæ Latinæ magister,

ster, &, quicquid ad summum pervenit, ad exitum properat, ait idem. An verò ad summum omninò pervenerint literæ, non est meum dicere: quia nec ego, nec forsitan quisquam præter DEum, *τὸ ἀνθρώπου* hoc est summa rerum adeoq; & literarum novit cacumina. Et opinor ad finem usq; mundi non fore ita consummatas scientias, quin semper aliquid superfuturum sit, quod addi iis possit. Multa nobis ignota venientis ævi populus sciet. Rerum natura sacra sua non simul tradit. Semper servat Eley-sis, quod revisentibus recludat. Interim quicquid sit de futuro, ad sublime culmen evectas hodie literas & scientias esse, nemo eorum, qui emunctæ in talibus naris sunt, diffitebitur. Non lubet jam omnia artium genera percurrere, quia ea res operæ esset prolixioris. Pauca nec nisi levi brachio, quod ajunt, attingam. Ac primum lingvæ nonne ita præclarè effloruerunt, ut ipsa ejus, quod affecutæ sunt, fastigii conservatio ac custodia multum posteritati datura sit laboris. Olim unam lingvam eamq;
verna-

vernaculam curatius aliis excoluisse summæ dabatur laudi. Nonnisi Græcè, quantum nobis quidem compertum est, loqui noverat Demosthenes, & eum tamen

— admirabantur Athenæ (tri.

Torrentem, & pleni moderantem frēna thea-
Ennius tria corda sese habere dicebat, quòd
Græcè, Oscè, & Latinè loqui sciret. O quàm
hodie gloriæ illum suæ puderet, si viros sex, se-
ptem atq; etiam decem linguarum peritos au-
diret! Hebræa lingua superioribus seculis ra-
rissima erat inter Christianos Europæos. Vix
centum quinquaginta anni abiēre, cum Joa-
nes Capnio, vulgò Reuchlinus, eam linguam
docenti Iudæo pro singularum horarum operâ
singulos aureos penderet Romæ. Tanta erat
in ipsâ etiam Italiâ lingvæ istius eo tempore
ignorantia. Hodie non Romæ tantum, sed in
Europâ passim, nec in Academiis modò, sed
& alibi, & sæpè ubi haudquaquam speres, vi-
ros reperias, qui Hebræam unâ cum rivulis suis,
Chaldæâ, Syrâ, Arabicâ, Targumicâ exhausē-
re. Iam Latinam linguam si expendamus, an-
non eum jam nitorem adepta est, ut ipsa vetus
Roma majorem vix habuerit, propè etiam vix

B

sperarit?

sperârit? Deterferant superioribus seculis incur-
dem hanc Romanam, situ equidem fœdissimo
sqvalidam Politiani, Petrarchæ, Ioviani, Sado-
leti, Manutii, Erasmi, Buchanani; Scaligeri,
Lipfii, Schotti, Duzæ, Mureti, Maffei, Grotii,
Heinfii, Tursellini, Stradæ, Vossii aliîq; quos lon-
ga sit enumerare mora. Hi omnes certatim
eam limam Latinitati, id acumen intulêre, ut
illa jam deteri porrò magis, quàm exsplendescere,
frangi ferè citiùs, quàm acui amplius posse vi-
deatur. Neq; prosâ tantum oratione seriora
hæc secula ita emicuêre: ligatâ quoq; ita excel-
lunt, ut antiquis poëtis non aliam propè præ se
eminentiæ laudem recentiores relinqvant, quàm
quod illi tempore anteriores faciem istis præluxe-
rînt. Et hi illis eo quoq; admirabiliores existunt,
quod peregrinâ in lingvâ eum apicem attigêre, &
aliqui in utroq; sermonis genere; ita ut nescias,
meliores ne Oratores, an Poëtas dicas: cum
antiqui (excepto Senecâ aliisq; paucissimis) fe-
rè alterutrum duntaxat assecuti sint, ut aut Poë-
tæ, aut Rhetores essent eximii.

¶ Jam Philosophiam si inspiciamus, in quod
decus à Toletis, Fonsæcis, Zabarellis, Picco-
lomineis, Conimbricensibus, Keckermannis.
Paciis,

Paciis, Verulamiiis, Campanellis, Lycetis, Gassendis evecta est? quibus inventis Astronomia à Copernicis, Braheis, Origanis, Galilæis, Cru-geris, Bulialdis, Heveliiis exornata est? Quo splendore Geographia per Ortelios, Mercatores, Cluveros, Merulas, Jansonios, Bochartos aliosq; enituit? Quibus jam Atlantibus innixus Orbis terrarum omnium undiquaq; oculis patet, etiam eâ parte, quâ veteribus olim incognitus fuit? Quam lucem nunc habet ars Magnetica, quam altera illa, quæ ignibus fulminat, quam ista deniq;, quæ terram alendo homini conditam, miris machinamentis ad vim arcendam inferendamq; accommodat? Iam ars illa artium Politica quò, DEum immortalem! hodie progressa est? Quam propè fræno indiget, ut intra terminos maneat, quos homini nefas est transcendere? Quam sagacia in conquirendis aliorum astibus, quam fæcunda in fingendis suis sunt ingenia! quâ acrimoniâ, quâ suspicacitate indagantur præcipiunturq; consilia, & eventa consiliorum, etiam cum in arcanis adhuc factorum tabulis latent. Estne sinus aliquis Tiberianus, estne Florentina ulla techna, vel latebra, in quam Pragmatici nostri non penetrârint?

netrârint? Suntne artificia, in quibus vel subtilissimi veterum Aularum Magistri non discere potius apud nostros, quàm docere debeant aut possint?

Non attingam nunc cæteras facultates, quia nimium ultra limites præscriptos diffunderetur oratio. Et hæc, quæ dixi, satis id evincunt, quod asserui, celsò in culmine plerasquæ jam constituisse disciplinas. Potius itaq; ad id, quod inprimis agere institui, accedendum est, ut ostendam, quomodo conservari iste literarum flos, vigor, dignitas & splendor debeat: ne quod heu! nimium meritò timetur, imò imminere fermè cernitur, in exitium vergant artium studia, potius verò eodem fulgore, quo nos circumfudère, ad seram possint transmitti posteritatem. Ac primùm nihil præter rem dicturum me arbitror, si quod de Rebusp. atq; imperiis asseri solet, id de disciplinis affirmavero: iisdem scilicet modis artibusq; conservandas eas esse, quibus partas, quibus auctas, quibus ad lucem & robur suum eas pervenisse videmus. Modos autem illos, quibus disciplinæ exsurrexère, non adèd arduum est reperire atq; edisserere. Cum in vetustatis regredimur memoriam.

moriâ, artes eo plerumq; tempore caput suum extulisse deprehendimus, quo Principes, quo potentes aliqui magistratus excolere eas, aut fovere saltem cœperunt. Illos soles sequitur semper hoc scientiarum atriumq; ut sic dicam, heliotropium. An unquam gloria literarum & sapientiæ magnificentius exsplenduit, quàm tempore Aristotelis? At nempe inciderat is in Philippum & Alexandrum, illum Macedoniæ Regem & Græciam universam animo, penè & imperio complexum, hunc Orbis totius primò candidatum, mox & possessorem. A Philippo splendidissimum de eruditione suâ iudicium, & mox honestissimum ad expolienda sapientiæ studia otium: ab Alexandro non majora tantùm vitæ præsidia, sed apparatus, etiam, instrumenta, & quicquid ex orbe in Macedonum tum leges atq; imperia eunte, ad rem suam necessarium, aut utile sibi putaverat, adeptus est. Ita certantibus ingeniosi Magistri, & munifici discipuli studiis in altum se sustulêrunt artes. Ille rimando, docendo, scribendo, iste fovendo, subsidia & quicquid ingenia excitare solet, suppeditando ignorantiam, ignaviamq; seculi expugnabat. Romæ nun-

quam pulchriore pleniorq; vultu effulsere artes, quam Iulii Cæsaris atq; Octaviani temporibus. Quæ causa? quia & ipsi erant eruditissimi, & eruditionis summi æstimatores. Nunquam fortè Roma tales Virgilios, nunquam Horatios nobis educasset, nisi optimus ille Augustus benignitatis & munificentiae suæ uber ingenii istis admovisset. Nunquam fortè Seneca ad eam laudem pervenisset, nisi Agrippinæ, nisi Neronis, boni sanè, antequam hominem exueret, discipuli beneficentia adeò illum, non fovisset tantum, sed ad nauseam usq; satiasset. Hebetior forsan aut obscurior fuisset Bilbilici ingenii (Martialem intelligo) mucro, nisi eum Domitiani, mali quidem, sed literati principis acuisset favor. Non Claudiano, non Ausonio fortè tam fluida fuisset vena, nisi illum Ruffinus & Stilico, hunc Discipulus Imperator tantâ benevolentia essent amplexi. Aliorum etiam postea Christianorum Cæsarum minimè equidem restrictior erga ingenia & literas liberalitas fuit. Sed quia literatissimi tum quicq; ad sacra studia vitamq; religiosam conferrent, inde factum est, ut beneficentiæ publicæ scaturigines in Antistitia & Episcopatus, in cænobia & alias
ejus-

ejusmodi porticus vel scholas sequerentur. Et in istis equidem studia semper viguere: Sed diu illa tantum, quibus animi, speculationum, remigio in altissima quæq; in nescio quas abstractiones, sæpè etiam in nubes & inania deniq; eveherentur. Quid verò mirum extra lucem publicam & in arcto tristem, severam, morosamq; vitam agentibus, politioris doctrinæ sorduisse lautitias, obscurum contra, intricatum, spinosum genus studiorum placuisse? Qui gubernacula rerum tractabant, facile pleriq; patiebantur, istos, penes quos magisterium sapientiæ esset, circa scirpos ejusmodi, nodosq;, se & simul alios occupare, omnis interim civilis prudentiæ facundiæq; expertes atq; incuriosos. Sic enim ipsi tanto facilius agere res suas, tanto proclivius fræna imponere omnibus, tanto securius artes astusq; inter homines istarum rerum rudes atq; inscios, exercere poterant. Quicquid sit, adeò non defuit artibus studiisq; Principum ac Magistratuum Christianorum beneficentia, ut ipsas etiam umbras cujuscunq; eruditionis liberaliter admodum aluerit. Adeoq; si superioribus seculis doctrinæ aliqua affusa caligo est, ea non potestatibus supremis vel Mecænatibus, satis profectò, imò

imò nimium aliquando munificis; sed Doctoribus & ipsis artium clientibus, verum scilicet sapientiæ nucleū ignorantibus, aut certè præ divinæ rei studio omnem literarum elegantiam ac munditiem spernentibus imputanda est. Cum postea istorum aliquibus melioris literaturæ lux affulsisset, quàm minimè in eos Patronorum clausit benignitas, quàm imò intentis propensiq; istorum studiis, politiores literas colentium labor provectus adjutusq; est? Quàm in delicijs Laurentio Medici fuit Politianus? quàm carus Francisco I. Gallorum Regi Budæus? quàm plerisq; Europæ totius capitibus adamatus cultusq; est Erasmus Roterodamus? quàm & gloriæ sibi principes seculi Viri duxerunt, illi homini, commercio aliquo, vel alloquio saltem literario innotuisse? Sed de Christianorum Mecænatum in literas benignitate quis dubitet? cum illis plerasq; Scholas & Gymnasia, quæ usquam ferè extant, debeamus. Illi sunt, qui focos, qui ignem hunc excitârunt, ad quem hodieq; Musæ nostræ calefiunt. Ab illis stipendia Magistri, ab illis non uno in loco liberalem victum juvenus, ab illis splendidissima privilegia & bibliothecas instructissimas meliores

liores scholæ ab illis jura honoresq; suos artiû professo- res, ab illis nobilitatis decora Doctores habêt. Et quot usq; collegia extant, quibus amplissimas largiti sunt opes summi Reges, Principes, Antistites, Urbium magistratus; quorum nomina quia nimis multa numero sunt, silentio nunc involvo, alioquin sanè non intermoritura, dum literis aliquis in terris honor erit. Neq; intra purpuras Magnatum sese hæc liberalitas continuit. Subinde etiam privati homines ad erigenda eruditionis & bonæ mentis templa conferendum sibi aliquid putârunt. Nempe nulli eorum, qui paulò plus supra vulgum sapuere, dubium fuit, gloriæ divinæ, cui omnia sua posthabere homo debet, istâ se ratione quàm pulcherrimè velificari. Videbant publicum bonum per instituta ejusmodi virtutis & sapientiæ seminaria luculentissimè promoveri. Inde quippe utilia Ecclesiæ organa, inde prudentes juris interpretes vindicesq;, inde peritos valetudinis humanæ curatores, inde deniq; idoneos publici regiminis præfides, Duces pastoresq; populorum depromi. Inde deniq; privato etiam cuiq; ea animi decora, ea subsidia peti, quorum in omnem vitam & fructus largissimus & summa innocentissimaq; voluptas est. Tam egregium

C

ante-

antecedentium seculorum fervorem nefas sit posterorum negligentiam destitui. Erubescenda labes erit, non prementium viam, adeo laudatis majorum vestigiis signatam. Eadem, quæ olim, literarum utilitas ac necessitas est, cur non idem erga illas ardor sit benignitatis? Eadem, & forsitan majores alicubi suppetunt opes, cur non eadem appareat liberalitas? Fateor priorum temporum homines nonnunquam nimiam quædam in operibus positam fiduciam ad bene de templis Scholisque merendum impulsos esse. Quid verò? annon ea quæ laudabiliter illi fecere, à vitiis aut nævis suis separari possunt? & facta separatione nonne id quod bonum est, retineri debet? Faceat age ille operibus suis coram DEO creatore superbientium fastus, at opera tamen maneant, & sine fastu ea facere contendamus. Non merentur ex se facta nostra gratiam Divinam: quia multa, ad meriti decus necessaria, illis desunt: at interim tamen grata sunt DEO, DEO nempe per & propter Christum propitio: ab hoc benignè illa acceptantur, & haud dubiè, si à verâ fide profecta sunt, præmium suum habebunt. Magna sunt, quæ Servator promittit iis, qui ipsi esurienti

esurienti cibum, qui sitienti potum, qui nudo vestimentum dederint. Et idem sibi præbitum interpretatur, quicquid minimo Discipulorum ejus fuerit præbitum. Quicumq; (clamat alibi idem Servator,) quicumq; solum aquæ frigidæ poculum uni ex his parvis nomine discipuli dederit, amen dico vobis, non perdet mercedem suam. Videmus igitur placere omninò DEO, nec incompensata manere, quæ ab homine fidei fiunt pia opera: inter quæ quin censenda sint, quæ in Scholas literasq; conferuntur, minimè profectò à quoquam sano dubitatur. Fateor olim aliis insuper stimulis homines, ad fovenda studia, alendos pauperes, erigenda aut dotanda Gymnasia, aliaq; ejusmodi beneficia, fuisse incitatos. Inprimis verò scio plurimorum animos in munificas ejusmodi cogitationes ab igne purgatorio exaruisse. Sed quid? an quia apud nos ignis ille sollicito & accurato labore extinctus est, inde caritas, inde ardor pietatis & munificentiae refrigescet? Ergone istius supplicii metu depulso, seigniores ad laudata opera erimus? Quin verò tanto magis ardere in-

nobis amor DEI, ardere studium erga gloriam ejus, erga Ecclesiæ Scholarumq; incrementa, ardere in pios & DEI filiis dignos conatus propensa voluntas debet. Ita scilicet veram, genuinam, vivam fidem in nobis esse testabimur, non cadaver fidei, quod profectò neminem servabit. Cadaver autem, non viva fides est, quæ ubi occasio & vires adfuere, in veros pietatis fructus non exuberat. Ita demum clarè ostendemus, uberiores nobis, quàm majoribus, veritatis lucem affuisse, cum lucis opera & meliora quàm illi, & frequentiora ediderimus. Exarsit præter solitum, fortè & præter spem vestram oratio: sed veniam facile inveniet apud vos, qui verum esse quod dixi, lubenter & ultrò subinde nec sine gemitu aliquando fatemini. Utinam tam efficaces & fructuosæ sint querelæ nostræ, quàm sunt necessariae!

Eqvidem de vestrà, Amplissimi Magistratus, in literas, earumq; antistites & alumnos benevolentia, curâ, manuq; liberali non est, quod dubitem. Eam quippe multa jamdudum luculenter probant ostenduntq;: Eam & nunc, ipsi parietes Gymnasii istius renovati loquuntur; eam inprimis quoq; pulchra ista & meliora.

Gymna-

Gymnasio fata spondens ordinatio, susceptaq; regenerationis omni studio procurandæ consilia evidentissimè omnium demonstrant. Quo nomine etiam in præsentiarum immortales vobis Musæ gratias agunt: vestræ liberalitatis uti nunc clientes & alumnæ, ita in perpetuûm futuræ decantatrices. Neq; ambigo, quin Patriæ patrum pietati, ornatissimorum quoq; civium, in literas amor, easq; omni modo provehendi studium, sit responsum. Sunt multifariæ rationes, quibus cuncti ferè dulcem utibilemq; rei literariæ operam navare possint. Et eas suis cuiq; animus melius, quàm oratio nostra monstraverit. Si cui alios modos de literis bene merendi vel natura, vel educatio, vel fortuna, negavit, hoc saltem à se impetrare unusquisq; potest, ut de illis aut non iudicet, aut iudicet benignè: & si beneficiis ornare artium clientes non valet, eos tamen non spernat, aut afficiat contumeliâ. Honos alit artes, omnesq; ad studia incenduntur gloriâ, dictum olim à Cicerone, nec à quoquam negari potest, verum esse. Hoc si solatium literis eripueris, rara, aut vilia sanè pectora erunt, quæ

se iis velint impendere. Sublatis studio-
rum pretiis etiam studia peritura sunt,
ut minus decora. Nōrunt experti (nam
rude vulgus aliter & perperam censeret) magnis
plerumq; laboribus atq; æumnis vitam litera-
torum, & inprimis in Scholis defudantium con-
stare, ac veluti deteri. Lucubrationibus & per-
vigiliis miserè identidem impallescent, chartis
& meditationibus dies noctesq; aliquando im-
morantes, ferè & immorientes. Curarum illis
assiduæ occasiones, rara verò & exigua laxamen-
ta sunt. Plerisq; etiam domi molesta soror &
contubernalis est paupertas. Et hanc ipsam
plerumq; pro dote affert uxor, si qua ipsis du-
cenda est. Rarò admodum bonos istos Pædo-
tribas benigno oculo Diva pecunia respicit, rarò
divitem censum Fortuna Musis largitur, in alias,
etiam manuarias artes, sæpè liberalior. Quod
si laboribus, curis, & has comitanti inopiæ con-
temptus insuper accedat, mirum propè non est,
quin animis collabascant, qui digno, qui deco-
ro sapientiæ studiis honore erigi debebant. Mi-
rum quoq; non est, si ceteri talem horum mi-
seriam conspicati, liberos suos cuivis alii potius
incudi

incudi, quàm literariæ velint impendi. Mirum, deniq; non est, si juvenus ipsa vestigiis ejusmodi deterreatur, quò minus alacriter animum ad studia appellat. illa inprimis studia, quæ passim non lucri tantum, sed & honoris videt esse sterilia. Sed ego à spectatis hujus Urbis civibus nullum ejusmodi contemptum Musis metuo: cum plerosq; eorum literis egregiè tinctos, plurimos etiam penitus imburos esse videam. Interim quia ad conservandam literarum gloriam honor earum pertinet, ipsa argumenti mei ratio non permisit, quin de contemptu literatorum aliquid injicerem, quo æstimatoribus artium, quasi calcar currentibus adderem, quorum deinde fiduciâ patrociniòq; alacriores Musæ tanto securius contemptores suos possint contemnere.

Jam postquam quid publicè erga artes & artium cultores fieri debeat, vidimus, privatim quoq; quid ab omnibus & singulis ad tuendam earum dignitatem augendumq; splendorem conferri possit, considerandum est. Ac primum cuiq; eorum, qui filios suos literis destinant, etiam atq; etiam circumspiciendum est, an apti sint filii ad id, quò destinantur. Vti enim,

enim, non omnis fert omnia tellus,
sed nempe:

Hic segetes, illic veniunt felicius uve,
Arborei foetus alibi, atq; in iussa vire-
gramina: (scunt

ita non quævis indoles ad omnia æquè apta est.

Non ex quolibet ligno fit Mercurius,
ut in proverbio circumfertur. Iam autem in-
dolem dare sibi homo non potest. Qualem
natura & cœli favor dederit, accipit, cum na-
scitur, cum sui adhuc impos est. Magister

ex occulto DEUS producit ingenia,
ait Seneca. Oportet igitur hic DEI sequi ma-
num: oportet rimari & dispicere, quò quemq;
divina idoneum fecerit dispensatio. Quod si
quem igitur puerum vecordem, torpentis &
stupidi omninò ingenii esse vident intelliguntq;
Parentes, eum Musis ne consecrent. Animis
illæ dicatæ Dæ sunt: animos & pectora re-
quirunt, quæ de meliore luto finxerit Phœbus.
Pingvia illa, crassa, nil vigoris, nil industriæ
habentia ingenia ad alia vertantur opera, quæ
nullam singularem mentis vim desiderant, cor-
poris

poris magis quàm animi perfici solita ministerio.

Quamquam prudentiâ hic quoq; opus est, ut tarda à crassis, ut serò maturefcentia ab ineptis sciamus distingvere. Nam sunt nonnulla ingenia non rapida, non speciosa, sed quæ plus in recessu habent, quàm primâ fronte promittunt. Qvale in Thomâ Aquinate fuisse perhibent, quem ob taciturnitatem bovem mutum vulgari dicterio æquales appellavere: nempe ad fundum magni illius, sed modesti, & in verba non ambitiosi ingenii penetrare non valentes. At penetrârat Albertus magnus, qui bovem istum ejusmodi editurum esse præfagiit mugitum, quem universus mundus esset admiraturus. Sed deinde pro varietate artium & scientiarum, ad quas applicari quisq; adolescens debet, distinguenda sunt ingenia. Nam etsi artes omnes inter se cognatione aliquâ continentur: tamen non ad omnes æquè unum hominis sufficit atq; habile est ingenium. Alium animus ad speculandas res subtiles, alium ad dicendum in publico, alium ad sacra, alium ad profana & civilia mentis impetus rapit. Paucos ita singulariter do-

D

tavit

tavit natura, ut ad universum disciplinarum orbem, & ad omnia scientiarum ac facultatum genera æqvè sint idonei. Cum verò quisq; adaptatum Minervæ suæ pensum, cum convenientem ingenio campum reperit, tum verò & tanto alacrius opus suum facit, & majoris adipiscitur laudem perfectionis. Et sanè, si quos ullà in disciplinâ viros habemus excellentes; eos idèò curriculum suum adèò promptè decurrissè, atq; ad metam feliciter pervenissè constat, quia in materias ingenio appropriatas, quia, ut vulgò loqui solemus, in elementum suum incidere. Vt adèò meritò hîc repetam, ad tuendam literarum laudem plurimùm & id facere, si nec invita, nec inepta ad artes istas truantur ingenia; nec, quod in proverbio est, bovi clitellæ imponantur, sed cuiq; capiti, ut sic ludere liceat, conveniens pileus quærat. *Verum.*

Sed jam tandem ad educationem juventutis accedo: à quâ eqvidem ut omnium reliquorum vitæ generum ratio, ita omne quoq; decus literarum nostrarum potissimùm dependet. Tenerum arboris surculum prout manu flexeris, ita crescit: sic hominum unusquisq; non alius profectò erit, quam qualis fuerit ejus educatio. *Verum.*

Verùm cum in educandâ juventute partes suas Parentes, aut qvi loco parentum sunt, suas item magistri habeant, de utrisq; aliquid dicendum est. Ac parentes eqvidem, qvemadmodum post Deum vitam liberis suis impertiuntur, ita iisdem benè vivendi rationem pro virili tenentur instillare. Vita enim etsi magnum est beneficium, tale tamen est, ut eo vel vilissimus quisq; vermiculus fruatur. Sed si recta vitæ conformatio accedat, supra omnem ventri obnoxiorum animalium naturam, & ad ipsorum cœlestium spirituum viciniam attollere se homo potest. Ingens itaq; opus, sed ingens quoq; onus est liberos benè educantium. Non frustra olim Romani, post Reges ejectos, aliis blandimentis plebi concessis hoc quoq; adjectum voluere, ut pauperes à portoriis & tributo liberi essent; satis enim hos, aiebant, stipendii pendere, si liberos educarent. Sed quoniam Romanorum hîc nobis opportunè incidit mentio: non possum quin de eorum circa filios adolescentes curâ paulo meditatiùs loquar. Et id facio tanto lubentius, quod nulla usquam Respubl. nec major, nec sanctior,

etior, nec bonis exemplis ditior fuit:
tum &, quia quicquid istius laudis est, ejus
magnam partem educationi juventutis Vrbs il-
la debet. Eam autem graphicè admodum
Quintilianus magni sanè judicii vir depingit.
Vellem elegantem ejus locum ex pulcherrimo
illo de Oratoribus Dialogo, qui Taciti operibus
adjici solet, afferre hìc posse. Ibi enim, & quo-
modo se habuerit Romana disciplina, cum benè
se habuit, & quomodo postea prolapsa sit, di-
fertissimè exponit. Sed quia longior, nec pro
ratione hujus, quo circumscriptus sum, tempo-
ris, locus est, alium breviorẽ ex institutioni-
bus ejus contentus ero adduxisse. Utinam,
inquit, liberorum nostrorum mores non
ipsi perderemus. Infantiam statim de-
liciis solvimus. Mollis illa educatio,
quam indulgentiam vocamus, nervos
omnes & mentis & corporis frangit.
Quid non adultus concupiscet, qui in
purpuris repit? Nondum prima verba
exprimit, jam & coccum intelligit,
jam

jam conchylium poscit. Ante palatium eorum, quàm mores instruimus. In lecticis crescunt, si terram attigerint, è manibus utrinq; sustinentium pendent. Gaudemus, si quid licentius dixerint. Verba ne Alexandrinis quidem permittenda deliciis, risu & osculo excipimus. Nec mirum, nos docuimus, ex nobis audierunt; nostras amicas, nostras voluptates vident. Omne convivium obscænis canticis strepit: pudenda dictu spectantur. Fit ex his consuetudo, deinde natura: discunt hæc miseri, antequam sciant vitia esse. Inde soluti ac fluentes non accipiunt è scholis mala ista, sed in scholas afferunt. Ita de Romanæ educationis collapsâ disciplinâ vir Romanus querebatur. Suo sanè jure; cum vir optimus solutissimos seculi sui mores videns, & quantum in-

se esset, corrigere volens, morborum publicorum originem in intimis privatarum domuum radicibus scrutaretur & inveniret. Certè quemadmodum dura, & deliciarum expers educatio Scævolas, Horatios, Camillos, Fabios, Corvinos, Curios, Fabritios, Scipiones, aliosq; cum curâ nominandos Heroas effudit: ita quod nihil simile postea Roma produxit, id profectò uti aliis causis, ita inter alias molli laxæq; pubertatis educandæ rationi tribuendum est. Virtuti sanè, Auditores honoratissimi, minimè planum iter est in terris. Per alta & aspera tendit. Duris plerumq; negotiis enitescit, & maximo sudore in arduum laudis adnititur. Ad Virtutem itaq; non molliter etiam educandi sumus. Labores enim non feret, qui pingvi otio à teneris assuevit. Quævis aura offendit illum, qui inter perpetua fomenta & delicias adolevit. Sicq; adeò per inertiam saginatus perpetuò langvebit, nec labore tantum, sed mole, ut Seneca loquitur, & ipso sui onere deficiet. Quod si porrò turpibus puer innutritur sermonibus, si conviviiis luxuriosis

riosis accubat, si cum peccat, non reprehenditur, aut ab alterutro parente castigatus, alterius corruptrice palpatur manu, quis tum Chrysippus vel Cleanthes informando correxerit, quod quotidianâ domi depravat indulgentia? *Ægrè* exuitur cum longâ assuetudine fibris increvit opimum licentiæ vitiorumq; *Malè* ferunt *Linus Pistocleri*, cum omne reverentiæ & pudoris capistrum inter blanditias suorum didicere contemnere. *Laudabiliter* itaq; faciunt, qui filiorum suorum adolescentiam honestis laboribus studiisq; indurescere, quàm delicatis mollitiæ blandimentis enervari malunt. *Quod* *Achilles* inter fortium virorum primos habetur, id magnâ ex parte *Chironi* debet, qui quod asperis laboribus juventam ejus exercuit, idèò leonum visceribus & ferarum medullis aluisse eum dicitur. *Quod* *Alexander M.* tantum gloriæ culmen attigit, id *Leonidæ* inter alios acceptum ferat, nutritio & *Rectori* suo, viro autem antiquæ disciplinæ, atq; operum laborumq; eò rigidiori exactori, quia ipse toleraverat. *Henricum IV. Galliæ Regem* quid magnum fecit, quàm quod illum mox à sinu penè materno acceptum per aspera omnia duxit egitq; fortuna? *Quæ omnia*

omnia eò affero, ut demonstrem, non molli, non delicatâ viâ ad virtutis ac sapientiæ iri sacraria: Industriam, vigilantiam requiri, eiq; à primis mox ungviculis insvescendum esse. Inprimis verò dandam operam, ut privatim quoq; stimulos ad studia & honesta omnia, à suis capiat juvenus: & ne publicæ præceptorum disciplinæ vel auctoritati domesticis officiatur oblocutionibus. Nam alioquin sanè si magistrorum diligentia & in moribus censendis opera apud parentes, audientibus inprimis filiis, vapulat, nunquam tantum boni struetur publicè, quantum destruetur privatim. Potius verò respondere publicæ disciplinæ privata debet: ut domus nostræ, quantum fieri potest, mereantur elogium, quod domui Thomæ Mori, magni illius Angliæ Cancellarii tribuit Erasmus: Domus, inquit, Mori schola est, & Gymnasium Christianæ pietatis. Sciant Patres matresq; omnes, (liberè enim & pace scio vestrà, quod ad publicum bonum pertinet, proloqvar,) sciant, inquam, ægrotos se quodammodo dare liberos præceptoribus. Magna in illis plerumq; saburra est infirmitatum, impuritatum, ignorantia, contu-

contumaciâ. Istis defectibus medicari scholarum magistri debent, cûni possunt, sed non semper possunt. Et nonnunquam ideò non possunt, quia id non habent, quod in legitimâ medicatione requiritur, quodq; Hippocratis Aphorismus vult, ut non tantum Medicus & æger, sed & assistentes faciant officium. Assistentes autem in scholastico hoc negotio sunt parentes, sunt tutores, cognati, amici, omnes deniq; familiares eorum, qui curandi, hoc est, docendi sunt.

Quantum ad legitimam & conservando literarum decori necessariam juventutis educationem parentes conferre possint & debeant, dixi. Nunc ad vices accedam, quas in eodem opere sustinent literarum magistri. Vices dico de industriâ, (cum facilè aliud vocabulum sup- peteret :) ut Vicarios parentum præceptores esse & ipsi præceptores & discentes expendant. Adeoq; hi illis reverentiam & obsequium filiale; hi vicissim illis amorem curamq; paternam discant præstare. Mundo olim à manu creatoris recente, quia rudia nec latè diffusa erant sapientiæ studia, ferè etiam benè ac honestè vivendi regulis illa circumscribebantur, facile
E quod

quod discendum esset, à suo quisq; patre hauriebat. Nulla publica artium extabant Athenæ. At ubi augescente hominum genere curæ laboresq; domestici per contractas in arctum possessiones, tum & per ditescendi cupidinem crescerent, ubi juxta, quò longius procederent secula, eò difficilius opus Sapiaientia redderetur, non vacare, non sufficere amplius operosiori liberorum informationi parentes capere. Necessitas itaq; vel invitos eò adegit, ut homines quærerent in studiis versatos, & qui nulli alii se curæ impenderent, quàm institutioni juventutis. Istis Vicariam sui committebant potestatem: istis spem suæ quisq; domûs, & carissima scilicet thori pignora concredebant. Et id institutum summa utilitas successione continuâ ad nostra usq; tempora deduxit. Sed prout secula alia aliis sapientiæ doctrinæq; studio feliciora sunt, ita diversæ indolis atq; aptitudinis producunt Scholarum magistros. Beata illa, quibus boni tales, quibus apti & muneri suo sufficientes contingunt. Hi enim novam faciem, hi florem, vigoremq; singulis ætatibus possunt afferre: juventutem videlicet informando, in quâ genus humanum, etsi senii lethiq; sortem

sortem non effugit, subinde tamen reflorescit. Sed ut Informatores illi pro bonis haberi possint, quatuor potissimum meo iudicio requiruntur: ut nempe periti sint ipsi earum rerum, quas docere debent, ut apti facilesq; ad docendum, ut industrii, postremò, ut vitâ sint inculpabiles. Tali quadrigâ ubi res scholastica provehitur, non potest non feliciter procedere. Sed rarò illa ita omnia coeunt conspirantq;, quin alterum altero nonnunquam destituatur. Sunt aliqui (in genere hîc iterum loquor, non ad certum aliquod Gymnasium vel hominem respiciens) sunt aliqui, inquam, nimium leviter tincti iis disciplinis, quas tradere debent aliis. Ex quibus adeò scientiam vel artem æquè facillè sit trahere, quàm ex pumice aquam. Qvis enim dare possit, quod ipse non habet? Aliis non deest imò verò superest eruditio: at deest facultas, deest methodus eam communicandi: aliquando & voluntas abest. Invident enim nonnulli discipulis doctrinam, quasi doctrina non ejusmodi fax & lychnus sit, ut nihil ei decedat, si vel mille aliæ inde lucernæ accendantur. Fons est illa talis, qui æquè inexhaustus manet, etsi in quam plurimos fuerit rivulos

los divisus. Nonnullos verò industria deficit, res quæ utramq; penè paginam facit in hoc opere, & sine quâ cætera omnia, si vel abundantissima fuerint, manca sunt. Vt enim vel Dædalæa manu fabrefactum horologium nil prodest, nisi horam seu sono seu indice saltem designet: ita præceptor id, quod dicitur, revera non erit, nisi diligente manu juventutem sibi commissam ad nobile scientiarum & bonæ mentis duxerit fanum. Sed deniq; castigata à docentibus postulatur vita. Qvò enim mihi illi, qui doctrinâ oretenus exerciti, animum bonis artibus non induerunt? qui ut vetus ille ait, philosophâ sententiâ, ignavâ verò ad vitam operâ sunt. Profectò dici non potest, quantam literis, quantam juventuti tales afferant pestem. Qvò quò minus à quoquam negari, eò majore libertate & faciliore omnium veniâ dici latiusq; etiam à me explicari potest. Ac primùm tempore, cujus solius honesta avaritia est, intemperantissimè isti plerumq; abutuntur, dum poculis, dum sacris Idaliis, dum aliis ejusmodi vitiis indulgent. Haud sanè illi oppletum Cerere Bacchoq;

choq; pectus facîle appellunt ad studia: & plerumq; hesternæ comestationis vaporibus prohibentur Solem orientem, illum Musis amicum, intueri. Et quid illi, quando ex crapulâ ructantem stomachû, quando madidos, fractos, semisomnos oculos ad docendum asserunt, coram juventute effudent boni? quàm suaviter verba præceptaq; eorum merum aut nescio quid sordidum olentia, influent in aures animosq; discentium? Quæ porrò apud literatam pubem autoritas talium erit, qui præceptores cum sint aliorum, ipsi sunt vitiorum discipuli? Nonne viros ob conceptam de virtute eorum opinionem venerari ac revereri solemus? at famam virtutis quomodo isti tuebuntur, qui in contraria vitia identidem cernuntur ruere? Sed quid deniq; boni in formandis adolescentum moribus efficiunt tales, qui præceptis suis vivunt dissimiles? Non æqvè profectò pectora doctrinâ imbuent, quàm mœurs inficient exemplo. Facîle tenellus & parùm adhuc recti tenax animus sequitur eum, quem frequenter audit. Nec ægrè subrepunt vitia, cum se ingeniis per se fragilibus atq; imbecillis autoritate docentium commendant. In omnibus itaq; juventæ formatoribus requi-

ritur vita, non quidem tristes, aut superciliosæ, sed tamen piæ, honestæ, omnibusq; quas humana imbecillitas & vitæ cujusq; conditio capiunt, virtutum fulgens ornamentis. Ita demum muneri suo verè satis facient, ita nomini respondebunt, ita ad conservandam literarum gloriam plurimum afferent momenti. Sed jam ad ipsam me converto juventutem: quam sanè, si rem literariam salvam esse volumus, vel imprimis cervices oneri necesse est supponere. Gemunt sub hoc eruditionis velut ruituro cœlo Atlantes literarum; & certè vel ob ætatem deficient sub pondere. Quò magis opus est, ut novi Alcidx succedant. Ut tales autem Alcidas faciamus, Alcidx, hoc est, Herculis viam ingredi oportet adolescentes. Viam non voluptatis & deliciarum, quam Heros ille, ut no- stis, sprexit, sed laboris, industriæ, sudoris, vigiliarum.

Non est ad astra mollis è terris via.
Ad literarum quoq; gloriam ac decus via non mollis est. Vendunt Dii, ait ille, omnia mortalibus labore: quanto magis pretiosissimum salutarium artium & scientiæ thesaurum? In altis montibus defodere hoc aurum cœlestis sapientia.

de conservandâ literarum gloriâ.

39

piencia voluit, ne in proclivi & propatulo exstans vilesceret, sed ipsâ nobis difficultate assequendi commendaretur. Etenim ut rectè Poeta ait:

Lætius est, quoties magno sibi constat honestum.

Si in certamine Olympico qualiscunq; industria facilem dedisset victoriam, non erat ista adeò grata, adeò magnifica futura. Non fuerat Æneæ tam cara Lavînia, tam jucunda Italia, nisi & hanc & illam — fato jactatus & alto, Per varios casus, per tot discrimina rerû, obtinuisset. Non ita gloriôsè Romam suam intrasset egregius ille Horatius, nisi tantum illi operis, tantum periculi fortes fecissent Curiatii. Non essent tam pretiosæ margaritæ, nisi ab ultimo mari per tot tempestatum naufragiorumq; pericula peterentur. Nobilior margaritis omnibus res est Sapientia, & ut nobilior, minore tamen labore, minore periculo ac quasi pretio acquiritur. Haud est opus, ut eam assequaris, longinqua adeò maria trajicere, non opus est ad Indos currere extremos. Propinquæ aut saltem non adeò remotæ â nobis officinæ sunt,

ex

ex quibus, si ipsa sibi non desit juvenus, comparari illa potest. Circumstant ferè ipsam nunc inter nos nascentem infantiam Musæ, & in sinum propè earum è suo matres sobolem hodie projiciunt. Certe est in promptu & ante ipsos quasi pedes, ubi pectora informari possint. In aperto stant fontes, unde purissimos illos disciplinarum latices licet haurire. Sed non sponte tamen in ora influunt: applicanda manus est, attrahenda aqua ista, aliquo cum labore, tamen tali, qui & assuetudine levis fit, & ingens deniq; sui præteritum fructumq; uberrimum secum ducit. Si cui gravis molestia & arduus labor videtur, quem literæ requirunt, is sciat, non parvo quoq; sapientiam, imò longè majorem, quàm hodie constat, veteribus constitisse. Notum est ex Valerio Maximo & Plutarcho, quibus ærumnis, quibus molestiis illud Græcæ Eloquentiæ fulmen Demosthenes, oris vitium, exilitatem vocis, laterum defectum correxerit: quomodo antelucanam fabrorum operam anteverterit, quoties Thucydidem suâ manu descripserit. Unde & Valerio de ipso vox illa excidit: alterum Demosthenem mater, alterum industria enixa est. Aristotelem

Diogenes

Diogenes Laërtius testatur manu Sphæulam de nocte tenuisse, quæ per somnum in subiectum lebetem æneum delapsa strepitu suo dormientem excitaret. Euclides Megarensis, cum ob mutuum Megarensium & Athenarum odium bellumq; Athenas fronte apertâ adire non posset, veste muliebri, de nocte illas adiit, ut Socrâtis sermonum fieret particeps. Origeni patrum antiquorum doctissimo summa in studiis atq; inter cibum etiam continuata diligentia Adamantini peperit nomen: Joanni Grammatico assidua in Philosophiæ disciplinis exercitatio Philoponi appellationem conciliavit. Si recentiora adjicere licet, Iosephus Scaliger, at quantus Vir! cum sub tempus atrocissimæ & quāquam malâ, tamen latâ famâ celeberrimæ lanienæ, Parisiis juvenis ageret, ad eò Hebræis literis intentus sedit, ut hominum armorumq; strepitum, & tot puerorum mulierumq; ejulatus diu non audiret. Græcæ lingvæ cum operam daret Heinſius, sæpiſſimè ad Lunam ex Autoribus enotare solebat, quæ poſtridie Scaligero erat oſtenſurus. Quos antea labores tot clari & illuſtres viri, tot rara literati Orbis capita pertulere, eos ne hodie quoq; juventuti ſu-

stinere grave sit. Idem, quod illi quævivere decus, iidem, quos illi messuere, gloriæ, præmiorumque fructus, quæri & acquiri possunt hodie, dum contendere nervos, dum ingenii vires excutere velimus. Sed nempe, quod merito hæc queror, quia & alii prudentes viri queruntur, cepit hodie plurimos nescio quis non tantum veteranus, sed & amor veterani, ut ad quemvis laborem horrescant, & quodvis vel levissimum jugum grave videatur cervicibus. Non paucos ipsa jam librorum, aliorumque, quæ felicitas seculi nobis suppeditat, copia subsidiorum omissos, & aliena scilicet diligentia desides ac negligentes facit. Nempe enim, quia tot libros conscriptos, tot perpetuo adhuc scribi vident, putant unà cum libris sapientiam emi posse: maluntque adeo argentum, quam ingenium, malunt nummos, quam nervos impendere: nihil eâ in re sapientius agentes, quam si quis plena optimorum medicamentorum myrothecia habens, ita sanum se fore putaret, etsi nullo eorum uteretur. Blandum est, sed inane & valde insuper noxium palpum istud, quo desidiæ suæ illi adulantur. Extant, fateor, nobilissima in omni artium genere librorum monumenta, adeo

adeò ut penè copiâ eorum laboremus. Extant egregia in optimos quosq; Autores commentaria: sed cur ideò eorundem autorum explanationem à vivâ voce non petat juvenus? Plus una hora viri docti & prudentis auditione transacta docere te potest, quam multæ horæ lectioni impensæ. Ille enim selecta tantum & tibi tuoq; ingenio & profectui apta proponet: cum commentatores sæpè in ambages & excursus prolixos, sæpè & ambiciosos magis, quam utiles sese diffundant. Et si ex his ipsis meliorem succum cum cura & judicio extractum adolescentiæ Professor proponat, habet profectò hæc, cur illi agat gratias. Porro legentibus facile tædium & plerumq; torpor quidam, sæpè & sopor oboritur: certè nunquam ita lectio, quam viva vox penetrat subitq; animos. Præterea id quoq; identidem accidere videmus, ut commentaria, quia semper habere & legere nos posse credimus, ferè nunquam legamus: ad illa vix nisi tum confugientes, cum necessitas aliqua adigit, vel occasio invitat. At quot occasiones quoq; offerre se possunt, ubi nullum ejusmodi librum tecum habeas? Quàm tu sudabis tum, quàm erubesces, nisi ex audito ma-

gistro aliquid memoriæ, quod te juvet, inhæserit? Habent, mei carissimi juvenes, habent multi illi interpretes, habebuntq; usum suum, et si Præceptores quoq; publicè audiveritis. Vix unquam tam felix vobis memoria erit, ut omnia, minima, maxima, quæ audieritis, exactè per multos annos retinere & quoties opus erit, reddere possitis. Ideòq; sic etiam vos ad interpretationes seu excusas typis, seu manuscriptas, ipsa res & necessitas aliquando compellet. Malim tamen ad eas confugere possitis, quas ipsi ex ore Præceptoris exceptas manu vestrà consignaveritis. Nam alioquin, quia multi extant interpretes, antequam in optimum incidatis, diu hærebitis ambigui: et si reppereritis talem, tamen antequam ei assvescatis, tempore iterum & labore opus est. Præterea svaviores erunt proprio labore scriptæ explicationes præceptionesq;: faciliores quoq; intellectu, faciliores retentu, quia & vox dictantis, & vestra scriptionum industria eas inscripsit: deniq; & tutiores ad usum erunt, quia non omnibus ita obviæ & pervagatæ sunt, quàm quæ typis expressæ lucem publicam oculosq; adeò seculi subière.

Iam de methodo quoq; studiorum jure aliquid

quid dicendum esset, honoratissimi Auditores. Nam sanè ad promovendam tuendamq; rem literariam illa vel maximè necessaria est: neq; aliam majorem fundi nostri Apollinei calamitatem novi, quàm quod methodum aut non rectam, aut non constantem habemus. Verùm id argumentum, etsi plurimorum hodie & celebrium ingeniorum industriâ agitatam, adeò tamen difficiles adhuc explicatus habet, ut paucis lineis, quas tempus nobis circumdat, comprehendì definiriq; non possit, & ob gravitatem non debeat. Itaq; re istâ in aliud mediotamentum reservatâ, id tantum nunc moneo juventutem, ne studia sua præcipitet. Ut ætatis humanæ, ita eruditionis certî gradus & quasi processus sunt. Quibus si rectè & ordine progrediatur, pulcherrimis auctibus adolescit, & ad maturitatem provehitur doctrina. In rebus naturæ ductum sequentibus non fieri saltum, sciunt docentq; Physici. Et si fiat saltus, malî id illis ominis est. Certè si puer ante annos sapiat, si virilia adolescentulus tractet, eum aut antè annos moriturum, aut iterum præmaturè puerum fore, aut certè supra leges naturæ futurum portendunt. Naturam ars sequi solet &

debet: & si sequatur, minus aberrabit, cursuq;
faciliore ad metam suam pertinet. Mala se-
ges toret, si culmo vix supra terram emicante
spica mox appareret: mala messis sub nostro
hoc sidere esset, si quæ fieret in Iunio. Malè
arbor haberet, si cum flore fructus mox matur-
resceret. Ita in studiis ordine omnia fieri oport-
et, & per certa intervalla ad arrium fastigium
adscendi. Canis festinans cæcos parit catulos;
ut est in proverbio. Nihil boni pariter efficit,
& periculosè plerumq; labitur, qui non per gra-
dus, sed per prærupta & abscissa ad cacumen
aliquod, non eundo, sed saltando contendit.
Monendum hic & illud est, ne nimis vel cre-
brò vel citò præcepta, præceptores, scholamq;
mutet juvenus. Non obducitur musco lapis,
qui frequentius movetur. Non convalescit
quæ sæpe transfertur planta. Non
venit ad cicatricem vulnus, in quo cre-
brò medicamenta mutantur, addo ego,
cui quies iusta non conceditur. Inprimis au-
tem perniciosè admodum peccatur ab illis, qui
antequam in pædagogiis sese recte excoluerint,
ad Academias festinant, similes illis, qui ante-
quam

quam rivum trajicere didicerunt, magno se mari committunt: aut aviculis, quæ vix emicantibus demum plumis per vastum æris inane volare audent. Quid in Academiis teneri ejusmodi studiorum Tyrones proficiant, plusquam satis experientia nos docet. Plerumq; libertate illâ, quam nondum capiunt, corrumpuntur, & ubi multum temporis, multum & argenti decoctum est, inde, vacui sæpe, & in literis usq; Tyrones, in vitiis plusquam viri, revertuntur domum. Adeò ut adolescentes illi, qui ante justos ætatis & studiorum progressus ad majora artium theatra, illaq; virginum Musarum haud semper æqvè virginea domicilia properant, nihil aliud magis quærere videantur, quàm ut propiore arctioreq; suorum custodiâ tanto citius elapsi, suo vivant magisterio, & argentum, quod nonnunquam genium suum defraudantes patres ægrè comparsêrunt, tanto liberior celeriusq; prodigant.

Tandem & illud studiosè inculcandum est juventuti, ut in quantiscunq; suis profectibus nunquam immemores sint modestiæ. Ut togâ brachium, quod apud antiquos dicebatur, continere discant, ne supra magistros sapere se putent,

tent, ne unquam blandiantur sibi, nunquam
 de se sibi credant: neq; enim vel facilius vel
 periculosius quàm à seipsis decipi possunt. In
 bello nemo citius vincitur, quàm qui in limine
 victoriæ se esse putat & securus est: in studiis
 quoq; nunquam minus discitur, quàm ubi pu-
 tamus non parùm nos didicisse. Magni homi-
 nes & pro sapientissimis habiti hoc se unum
 scire professi sunt, quod nihil scirent. Inter
 summos eruditi hujus seculi viros novi unum,
 cui nullum familiarius in ore vel calamo dictum
 fuit, quàm, quantum est, quod nescitur!
 Et quid tyrones dicant, quibus vix à limine
 Musas salutantibus, ad interiora sapientiæ pene-
 tralia nondum patuit accessus: quiq; adeò, quod
 in Oceanum illum scientiarum vix de littore
 prospiciunt, ne hoc quidem sciunt, quod nihil
 sciant? Beati, si hoc saltem non ignorarent:
 nam primus hic & maximus ad scientiam tum
 gradus, tum stimulus foret. Tritum illud, sed
 verissimum & sæpè repetendum est: Multi ad
 sapientiam pervenire potuissent, nisi se
 putassent pervenisse. Et quod Græci dicunt:
 εἰς οὐρανὸν ἐγχεσθὲν τῆς προκοπῆς, Sed ut qui opinione do-
 ctrinæ

Strinæ turgent, mederi sibi possint, accipiant en-
modum. Ne comparent se cum illis, quos
post tergum reliquere: sed cum alijs, quos an-
te se vident. Inspiciant magnorum virorum
curricula, & considerent, num illi non doctio-
res eâ ætate fuerint, quâ ipsi sunt, qui ita sese
circumspiciunt, magis sui, quàm scientiarum
pleni. Quod hîc dico de intuendâ egregiorum
virorum vitâ, magnoperè omnibus vobis, qui
ad primiceriam eruditionem contenditis, neces-
sarium est. Istæ Polycleti statuae, ista Miltiadis
trophæa, & nempe tam perfectionis exempla
quàm imitandi incitamenta sint. Ponite vobis
ante oculos Scaligeros, Camerarios, Lipsios,
Gasaubonos aut similes aliquos, & non ante vo-
bis finem discendi faciendum putate, quàm
propè ab illis constiteritis. Etiam superare il-
los, si Deus velit, cupiditas & ardor sit. Ad
prima ista nomina dignè adspirantes, ultra me-
diocritatem saltem, nisi subsidia absint, procede-
tis. Et ut ad summa non perveneritis, in se-
cundis tamen consistere gloriosum erit. Repu-
tate vobiscum, nunc quoq; nullam virtuti viam
inviam esse. Quò unquam ante adscenderunt
ingenia, eò cum bono Deo etiam hodie pos-
sunt

sunt pertingere. Modò post favorem Numinis
vivida & exsomnia indoles adsit, modò labor
non displiceat, modò manuductor non desit,
modò animum dulcedo studiorum, modò amor
gloriæ atq; immortalitatis excitet mentes atq; in-
flammet. Incalui iterum, nobilissimi Auditores,
& præ ardore propè oblitus sum metæ, quam
vos dudum forsan respicitis desideratisq;. Am-
plitudo argumenti provexit me adeò longè: &
nihilominus usq; sat spatiosum restare video
campum, in quo excurrere posset oratio, nisi pa-
tientiâ vestrâ nimis immodestè abuti, mihi esset
religio. Quid restat, Deum Opt. Max. supplex
oro ac veneror, ut qui nobile depositum, sapi-
entiam, qui literas, pulcherrimos illos æternæ lu-
cis radios & characteres humano generi credi-
dit; earum fulgorem & majestatem porrò nobis
conservet, & à nebulis ignorantiae, à facibus
corruptelarum & abusu magis magisq; depu-
ret. Ille vindices ejusmodi porrò suscitet, qui
barbariem signa sua explicare parantem strenuè
coërceant ac propulsent: verum autem sapientiæ,
sed salutaris, sed tranquillæ culmen, Orbi, qui ob-
inanis & tumultuosæ sapientiæ umbram in certam
perniciem ruit, gnaviter prudenterq; ostendant.

Ille

de conservandâ literarum gloriâ.

51

Ille Amplissimo. etiam Civitatis hujus magistratui perpetuò benè esse velit, qui inter tot alias gravissimas curas Musarum Patrocinium non deponit: sed illas à situ, contemptu, & imminente velut caligine vindicatas, in majorem subinde asserit splendorem. Ille Vrbi universæ benè esse velit, quæ ut literatorum plena, ita literarum nutrix & hospes benignissima inter maxima decora sua usq; reputat, pretium Phœbo Musisq; posuisse. Benè esse velit Gymnasio, quod in noctem ante vergens, & plurimorum funerum quasi tenebris offuscatum, nunc novâ luce refulget, & velut de sepulchro aureum caput attollit. Benè esse velit omnibus, qui in hoc Gymnasio desudant, qui scholasticæ arenæ vorant pulverem, ut hunc literis demant: quiq; adeò inter labores assiduos & sempervigiles curas salubrem eruditionis succum juventuti instillant. Benè & tibi, florentissima sit juven-tus, ut, quemadmodum ipsa spes es parentum tuorum, & flos generis tui: ita spem omnium non æqves tantum, sed & superes: ut vos, qui illustribus ortum debetis familiis, earum fulcra & ornamenta; qui humiliore nati estis loco, novi splendoris Vobis generiq; vestro sitis autores.

G 2

Adsit.

92 Oratio de conservanda literarum gloria.


Adsit mihi, & omnibus, quicunq; in partem laboris venient, divina gratia, ut quicquid ad DEI gloriam, quicquid ad publicum rei Christianae bonum, quicquid ad decus & emolumentum literarum pertinet, acutè perspicere, gnaviter aggredi, feliciter exequi possimus: atq; ut in his terrenarum Scholarum palæstris, regendo luctandoq; ita versemur, quò in coelesti tandem Academia à Christo, DEO & summo Scholarum nostro, lauream donemur aeternae felicitatis.


DIXI.


Emendanda.

P. 4. lin. 10. lege Firlejo. p. 6. lin. antep. post argumentum pone, verò. p. 10. lin. 4. post Erasmi, infere mox &. p. 15. lin. antep. lege admodum. p. 54. lin. 23. pone suz. Reliqua, Lector, ultro ipse corriges.









Bibl Jag

KSIEGARNIA

ANTYKWARIAT



735969

Biblioteka Jagiellońska
sldr0013635



